

Hobennan di team KYP a debati riba nivel halto

ORANJESTAD-Hobennan di Kingdom Youth Parliament a debati riba un nivel halto, hunto cu e nueve miembronan di team Aruba cu a representa nos isla den Kingdom Youth Parliament na Sint Maarten.

Nurianne Helder a regresa cas cu e premio di "Best Speech" mientras cu e ekipo completo a laga un bon impresion atras.

Relaciona cu celebracion di 200 aña di Reino Hulandes, a organisa diferente evento. Un di nan tabata un debate den "Kingdom Youth Parliament", cu a conta cu 50 hoben representando tur e paisnan for di Reino Hulandes. E prome evento a tuma luga siman pasa na Sint Maarten.

Aki na Aruba a habri posibilidad pa hobennan entre 15 y 23 aña, cu mester a entrega un video di 2 minuut, den cual nan mester a conta kico 200 aña di Reino Hulandes taifica pa nan. For di tur e videonan cu a drenta, a scoge 9 hoben y tambe e capitan di team cu tabata Marifer Aguirre cu ta studiando na Hulanda.

Aporte di parlamento hubenil

Parlamento Hubenil di Aruba a aporta grandemente na e evento aki, dor di a facilita diferente tayer pa e participantenan por a custuma cu e idea di debati y tene nan mes na protocol di reunionnan. Tambe a organisa diferente encuentro cu expertonan riba temanan specifico pa por a prepara e hobennan

miho posibel.

Despues di lunanan di preparacion, e grupo di Aruba a sali pa Sint Maarten, compaña pa nan coach, esta minister Michelle Hooyboer-Winklaar. "E hobennan aki a representa Aruba na un manera hopi profesional, cu hopi entusiasmo. Mi ta kere cu no por tabatin un miho team" Hooyboer-Winklaar a enfatisa durante e conferencia di prensa. Si nos mira kico a sosode durante e siman, kico a sosode pa reenforza Reino Hulandes, cuminsando cu locual nos ta considera nos futuro, esta nos hobennan.

E siman di debate

E tabata un siman hopi fructifero y exitoso, na opinion di e mandatario.

Di otro banda, Hooyboer-

Winklaar ta masha orguyoso cu for di e debatenan na Sint Maarten a sali un vision concreto pa con hobennan por sigui traha y desaroya Reino Hulandes. Tambe kico hobennan por haci pa segura cu Reino Hulandes lo existi 200 aña mas.

Na final, Hooyboer-Winklaar a aclaria cu cada un di e hobennan a sa di logra exito individual na varios ocasion durante e biahe. Claro cu como un team esey ta importante, pero pa nan mes individualmente nan a ricibi hopi reconocimiento pa nan presentacionnan, pa e forma con nan a bisti y pa nan entusiasmo demostra durante cada momento di e bishita na Sint Maarten.

Siguiente Kingdom Youth

Parliament

A acorda cu e siguiente Kingdom Youth Parliament lo tuma luga na Aruba mes, na aña 2017.

Dialuna mainta riba dia 26 di mei Minister Michelle Hooyboer-Winklaar a entrega cada un di e participantenan un certificado di participacion y un foto pa asina nan corda e momento inolvidabel den nan bida, tanto pa e evento mes, pa nan participacion, pa nan encuentro priva cu S.A.R. Prinses Beatrix y pa a representa nan pais dignamente.

"Mi no por caba di gaba e grupo aki, pa nan dedicacion, nan entusiasmo y nan forma profesional di debati y defende number di Aruba" Hooyboer-Winklaar a comenta. □